

亳州志

魏集

人物志 卷之九

儒林 文苑 隱逸

厚行 賓筵

人物志 卷之十

列女 外傳



亳州志卷之九

人物志

儒林

儒林卽道學也古史分而爲二則所謂儒者豈以文章云爾哉躬行心得垂訓教人斯無愧焉若夫潔已束躬確守繩墨是亦聖賢之徒也

唐

李敬位亳州譙人博覽羣書尤善於禮高宗在東宮馬周薦其才召入崇賢館侍讀假內府書讀

之遷弘文館學士拜西臺侍郎居職有能稱性
強識人一通姓名終身不忘有來訢者口論書
判無少差謬歷官中書令封趙國公生平撰次
禮論及他書數百篇卒贈兗州都督諡文憲

明

尹宏州廩生動止以禮目不忤視年四十餘應貢
不願仕進築室村居足跡不履城市人以純篤
君子目之

林義武平衛人補郡廩膳生員安貧不苟取早喪
父事母邵氏以孝聞學按二使旌其行以歲貢
授歷城訓導又改任河內後陞房縣教諭其師
範可風士咸仰之

錢岳本州人不求仕進敦尚行誼後進者多式其
規度

薛蕙字君采先河南偃師人高祖彬從軍隸武平
衛因家亳七歲能屬文十二能詩十五補郡學
生中正德癸酉科舉人信陽何仲默一見卽曰
此一代之望也遂把臂稱莫逆甲戌登進士授

刑部主事武廟南幸抗疏力諫受廷杖尋調吏部主事嘉靖以藩邸繼統錄用碩士卽轉吏部員外復遷考功司郎中時獻皇議加稱號廷訟未決獻皇者帝之本生父也武帝無嗣帝由藩裔繼後當時張璁等以所自出爲尊蕙乃稱述古今撰爲人後解爲人後辯凡數萬言入奏下獄旣而詔令復職丁亥丁母憂已丑除服吏部復移文促起之時權貴人方用事勢灼朝野蕙歎曰斯尙可俯首以就湯鑊耶遂絕意不復就

乃營舍於南園芙蓉紅藥竹樹叢甚取園名退樂亭曰瑩心典籍之外與農叟漁父相問答而已中丞馬易退樂之名曰常樂以額其園卒於家無子以旁支爲嗣蕙工於詩五言古有魏晉風味更潛心性命之學所著書有西原集五經雜錄大寧齋目錄老子集解莊子註行於世崇禎二年追贈太常寺卿

夏之臣字一無以進士令河間有治行邑人祠之擢御史多風厲出巡湖廣因掛議旋里再徵不

起闢園南郊花木自娛多吟咏如黃屋於今誰
稷契清風時至自羲皇醉客有時覓路入園丁
逐日報花開具見超然物外之意居鄉仍若寒
素所至戚里惟匹馬一僕隨之有醉犯之者曰
彼爲酒困耳何足較人多服其雅量本州錢糧
有時加派及別州縣有飛來者向上臺力持之
桑梓多蒙其澤

薛邦瑞字大年中萬曆壬戌進士家世於亳席豐
而清約如寒素就學江南爲尹嘉賓鑑知仕晉

江縣有政聲擢監司未竟其用後避闖賊之亂
卒於泗州

劉振甲字芝田少嗜學博極羣書善古文詞任蘇
州府訓導教授王良臣係名進士見劉所著作
輒歎爲不可及再訓沭陽望愈隆重緣病告休
歸里寄懷風月詩酒間蕭然自遠嘗有詩云三
杯濁酒陶元亮幾卷殘書葛稚川其風情可想
見也臨終未嘗就榻吟咏自如倏然而逝
周太和字迺衡歲貢生一生嘔笑不苟有嶽嶽懷

方之概天啓時魏忠賢橫肆朝野郡縣悉爲建
生詞徃徃由膠庠具請毫一二宵人議及此太
和挺然曰士獻一日之媚而犯千秋之議豈可
乎事遂已故毫獨無魏祠

馬光國號霽軒登乙卯鄉試榜考授司理不就職
後避闖賊之亂出授廣中數年還毫年已八十
五歲有五子曾孫輩皆入膠庠薛觀察雅孝廉
咸出門下文章品誼爲後進景仰

任之俊字寰一毫貢生好學嗜古清方自持不事
生產友教後學引古爲繩闖賊寇毫被執神色
不變卒之日四壁蕭然書卷之外無餘物

郭玉鉉字鼎涵舉歲貢嚴以立身和以處衆司鐸
旬容大江南北傳其坊表

賈文燦字含樸厚重少文以詩禮敦其家青緇塵
業不離尺寸爲鴻臚寺卿及解組歸里角巾布
紳無仕宦氣言信行果爲士人典型

顧爾言字信父博學善文以明經薦廷試一等賜
冠帶歸里絕意仕進嘗曰人苦不知足吾有田

以給養殮有室以庇風雨彈琴種竹課子讀書效古人以自樂此外復何求哉居鄉篤桑梓誼遇事有關係者輒慷慨以赴無所避諱鄉鄰多德之

李光采字儆齋舉歲貢生三子重光重輪重潤孫起家相繼咸舉貢士有文行名於時

文苑

文藝者道之緒餘見道于文無論已即風雲月露亦足以發揮天地抒寫性情下至書畫非學

有所自而殫心畢力于此不能工也則名當時而傳後世豈虛也哉

魏

曹植字子建操次子不同母弟也十餘歲誦讀詩論及辭賦數十萬言善屬文操常視其文謂曰汝倩人耶植跪曰言出為論下筆成章願當面試奈何倩人時鄴銅雀臺新成操悉將諸子登臺使各為賦植援筆立成操異之建安十六年封平原侯性簡易不治威儀輿馬服飾不尚華

麗每進見問難應聲而對特見寵愛徙封臨淄侯操征孫權使植留守鄴植既以才見異而丁儀丁廙楊修等爲之羽翼操狐疑幾爲太子者數矣植任性卽飲酒不節不御之以術矯情自飾宮人左右並爲之說故遂定爲嗣植嘗乘車行馳道中開司馬門出操大怒由是重諸侯科禁而植寵日衰操旣慮終始之變以楊修頗有才策於是誅修植內不自安不卽位誅丁儀丁廙植與諸侯並就國黃初二年監國謁者灌均

希旨奏植醉酒悖慢劫脇使者貶爵安鄉侯改封鄴城三年立爲鄴城王四年徙封雍邱王植嘗自怨憤抱利器而無所施上疏求自試明年太和元年改封浚儀二年還雍邱三年復徙封東阿上疏求存問親戚使諸國慶問四節得展以叙骨肉之歡恩全怡怡之篤義詔報可勅有司如王所訴植復上疏陳審舉之義帝輒優文報答六年封植爲陳王植每欲求別見獨談論及時政幸冀試用終不能得旣還悵然絕望時

法制待藩國峻迫寮屬皆下才兵人給其殘老
大數不過二百又植以前過事復減半十一年
中而三徙都常汲汲無歡遂發疾薨諡曰思年
三十一景初中詔曰陳思王自少至終篇籍不
離於手其撰錄植前後所著賦頌詩銘雜論凡
百餘篇副藏內外子志字允恭封濟北王晉受
禪降封鄆城縣公武帝誥曰志碩德清純宏才
高行好古博物爲魏宗英其以志爲樂平太守
累官散騎常侍卒諡定

曹冏字元首少帝族祖好學能文爲弘農太守時
天子幼稚冏作六代論欲感悟曹爽爽不能納
以致族誅

晉

夏侯湛字孝若譙國人幼有才名善文章美容儀
與潘岳友善同輿接茵時人謂之連璧泰始中
舉賢良對策拜郎中後出爲野王令政清多暇
著昆弟誥官至中書侍郎南陽相湛生盛族性
頗豪奢將卒遺命薄塋論者謂深達存亡之理

辛年四十九潘安仁作誄辭

嵇康字叔夜其先本上虞人姓奚以避怨徙譙家於銍之嵇山因命氏焉康早孤有奇才遠邁不群美詞氣有風儀而土木形骸不自藻飾人以爲龍章鳳姿天質自然博覽無不該通與魏宗室婚拜中散大夫好導養服食之事彈琴詠詩自足於懷常採藥遊山澤得意忘返樵蕪者遇之咸以爲神至汲郡山中與孫登遊登曰君性烈而才雋其能免乎居貧以鍛自給貴公子鍾

會往造焉康不爲禮而鍛不輟良久會去康曰何所聞而來何所見而去會曰聞所聞而來見所見而去會以此憾之後以呂安獄被繫會因譖於文帝曰嵇康卧龍也母邱儉將用之願以爲慮帝遂害之初康遊洛西暮宿華陽亭引琴而彈夜分忽有客詣之稱是古人授以廣陵散之操及刑東市顧視日影索琴彈之曰昔袁孝尼從吾學廣陵散吾靳勿與廣陵散於今絕矣康所著有高士傳太師箴等書兄喜亦當世才

歷太僕宗正

稽含紹從子好學能文自號毫邱子舉秀才除郎中惠帝朝爲中書侍郎累官至平越中郎將廣州刺史

曹毗字輔佐譙邑人少好文籍善屬詞賦累官下邳太守遷光祿勳有文集十五卷傳於世

金

劉瞻字崑老天德三年南榜登科爲史館編修自號櫻寧居士詩最工有集行於世

明

王寰洽字仁子七歲能詩十五補弟子員尋食餼築園聚書數萬卷日夕下帷詩文並逼古人九試南畿不售以選貢部考縣令未就職而卒有嬾園遺稿六卷行世

孫養粹

由貢任通判學有本源生當明季以愛國憂民之心發爲憤時傷亂之作觀其五難諸詩懷抱具見毫之文士繼西原而嬾嬾園者孫子也

薛鳳翔字公儀由例貢仕至鴻臚少卿能詩尤以善書名深得二王筆法購者珍之

國朝

吳楚奇字南英由鳳陽府學生中康熙壬午解元墨義人爭傳誦爲人瀟灑不羈作詩援筆立就每多警句尤工於畫嘗遊西江吳越繪其山水爲遊覽圖二冊著有西江遊覽集及瑣說一書論古今事自出已見亦足見一斑云

劉慧字宿頴思貢生善詩文早有聲名老而不遇因作美人愁十六首以思婦之詞寫勞人之恨其自跋云丈夫失意與紅粉無緣皆千古同傷婦嘆於室上哭於野此段衷腸何從泣訴聊作長歌以代痛哭人爭傳誦焉

隱逸

士生斯世將以有爲及處不得爲之時則潔身高蹈出于風塵之外非皆果於忘世者也其清風亮節傳之後世凡貪位慕祿而無益于國家者能無愧乎哉

晉

戴逵字安道譙國人少博學好談論善屬文能鼓琴工書畫性不樂當世嘗以琴書自娛太宰武陵王晞聞其善鼓琴使人召之逵對使者破琴曰戴安道不能爲王門伶人孝武帝時累徵不就子二長勃次顥俱有父風

南北朝

戴顥字仲若與兄勃並隱遯有高名年十六遭父喪幾於毀滅因此長抱羸疾以父不仕復修其

業父善琴書顥並傳之會稽剡縣多名山故世居剡下宋元嘉中徵並不就文帝每欲見之謂黃門侍郎張敷曰吾東巡之日當晏戴公山下也以其好音長給正聲伎一部十八年卒葬景陽山無嗣

宋

陳搏字圖南亳州真源人幼聰悟讀書一見成誦唐長興朝舉進士不第遂隱武當山移居華山每寢處至百餘日不起周世宗召至汴問飛昇

黃白之術對曰陛下爲天子當以治天下爲務安用此拜諫議大夫不就士大夫皆詰其所止願聞善言以自規搏曰優好之所勿久戀得志之地勿再往聞者以爲至言歷五季亂離每聞一朝革命輦蹙數日一日乘驢遊華陰市聞宋太祖登極驚喜大笑曰天下自此定矣太宗時來朝待之甚優宰相宋琪曰先生得修養之道可以教人乎搏曰搏於時無用屏居山野亦不知神仙之事假令白日昇天何益於世哉今聖

上有天人之表博達古今究悉治亂真仁聖之主也君臣同德興化致治勤行修煉無出於此琪以其語白上上益重之賜號希夷先生放還再召辭不至所著有指玄篇及寓言釣潭等集厚行

損人利己是謂之薄損己利人是謂之厚究之損人者於己未必利而枉爲小人利人者於己無所損而何不爲君子心未可知而行則衆著列其事所以勸人爲善也

魏

曹冲字舒武帝第四子也少聰察岐嶷生五六歲智慧若成人時孫權曾致巨象操欲知斤冲曰置象大船之上而刻其水痕稱物以載之則校可知操卽施行焉時軍國多事用刑嚴重操鞍馬在庫爲鼠所齧庫吏懼必死冲於是刀穿單衣如鼠齧者謬爲失意操問之冲曰世俗以爲鼠齧衣其主者不吉今單衣見齧是以憂戚操曰此妄言耳俄而庫吏以齧鞍聞操笑曰

見衣在側尙齧况鞍懸柱乎一無所問冲仁愛識達皆此類也

明

李文明以鄉貢授武英殿中書萬曆四十二年亳大飢文明捐米一千五百石以助賑勅賜蒼生寄命四字以旌之

本通志

王象新崇禎年間捐助兵餉授河南汝寧府通判

國朝

袁昌印字景僕天啟七年纂修實錄恩選貢監自

其祖袁義字近溪輕財仗義里中有凍餒者解囊發粟以拯之雉河有界溝深數仞寬五丈餘往來維艱獨捐已貲數千金建大石橋一座以便行者祖孫姓名現在碑石又濠梁驛馬四十四匹毫郡八里輪派當差喂養十室九空順治六年知州嚴自泰任點張四光當養昌印欲除其害遂自收養邀八里及通學三百餘人籲呈于州通詳上憲題請約計三年乃命下其馬仍歸本驛官喂養害遂以除其三年中上下費用皆

昌印一人獨任故老至今稱頌云

穆文理字蘊章郡廩生輕財仗義親族里黨婚喪無告者悉爲賑助嘗買鄰人劉姓地因其貧約五年後所取之租可以抵價遂退契還地毫不取直佃人園戶積年共欠千餘金悉召至焚其券子宗海字巨源國學生繼父之行里中待以舉火者數十家有沈姓王姓者素交好兩人既歿收其子衣食之復爲延師教訓以至成立康熙四十八年江北大歉餓殍載道宗海捐貲收

瘞計二百一十七人郡人至今交稱之

劉恩沛字雪洲以歲貢任行人司行人家多藏書捐貲獨建榔湖書院雍正十三年子晏字漢循白於父請蠲佃戶所欠租銀恩沛欣然允之計所蠲銀一千六百兩時晏任蕭山知縣撫憲趙旌其門曰興仁鄉國

周德宗字佩侯居北關馬廐街家素貧於雍正十一年九月十三日晚經淳化街得遺金二十兩坐守其人還之無來覓者明日復至原處候之見

一人倉皇而來泣告于衆德宗聞之應曰物在此勿用急詢其數目相符還之無德色失金者乃徐尉長也觀者義之白其事于州守尤公公甚喜給義可廉頑匾額并暖帽銀牌等物又詳上憲賜好義可風四字及花紅酒禮告示一紙免終身門面雜差

王慶澤字功襲候選州同乾隆四年捐地五頃爲書院肄業之費捐地三頃爲義學養正之費捐地兩頃爲寒儒應試之費又賑飢捐穀八千石

施棺捐銀二百兩並蠲佃戶所欠租銀三千六百七十餘兩奉 旨議叙州同雙單月遇缺即用

賓筵

鄉飲酒禮至大禮也立賓以象天立主以象地立介僎以象日月立三賓以象三光載在禮文者詳矣不得其人則罷而不行毫在明以前不可考

本朝亦罕舉行其可知者康熙丁酉三人而已就成

案事實錄而誌之以待夫繼起者

馬玉相歲貢生任訓導重道義能文章兄亾姪幼教育如巳子足跡不至公庭生平未嘗見其疾言遽色時值荒疫施藥濟人全活甚多以年七十四歲舉鄉飲正賓

孫興祥州庠生六歲喪父事寡母色養備至五十餘年如一日與弟共爨不忍分析弟亡姪幼撫育畢周性最謙和閉戶課子不與外事以年七十二歲舉鄉飲介賓

胡士鄭自母亡後同父寢興三十餘年鄉黨稱孝
兄晚年舉子姪皆幼冲教養成立和睦鄰里橫
逆之來絕不計較家素貧凡有義舉及人飢寒
者勉力捐貲以助以年七十歲舉鄉飲陪賓

亳州志卷之十

人物志下

列女

婦人職主中饋以順爲正苟安常處順能以賢
淑著稱者書之國史古今曾無幾人惟不幸喪
天及當離亂強暴相逼而節烈以顯夫夫亡者
守節爲難身殉爲易顧因撫孤而孤天事親而
親歿或親屬逼令改適則慷慨一死與夫輕生
相殉者當有異焉若夫未嫁而守志者雖於例

不符要亦其天性使然誠能始終一節亦有不
容異滅者分而載之其苦心貞節千載如見矣
后妃

魏

武宣卞皇后文帝母也隨太祖至洛董卓亂太祖
微服東出避難袁術傳太祖凶聞時太祖左右
至洛者皆欲歸后止之曰曹公吉凶未可知今
日還家明日若何面目復相見正使禍至惟死
而已太祖聞而善之文帝爲太子左右長御賀

后曰將軍拜太子天下莫不歡喜后當傾府藏
賞賜后曰王自以丕年大故用爲嗣我免無教
導之過爲幸耳亦何爲當重賜遺乎太祖聞之
悅曰怒不變容喜不失節故最爲難黃初中文
帝欲追封太后父母陳群奏曰按典籍之文無
婦人分土命爵之制在禮典婦因夫爵秦違古
法漢氏因之非先王之令典帝然之生子三長
文帝次任城王彰陳思王植

晉

景帝夏侯皇后譙國人父尚征南大將軍母曹氏
魏德陽鄉主后雅有識度帝每有所為必預籌

畫

夏侯太妃譙國人祖威兗州刺史父莊淮南太守
清明亭侯妃幼而明慧瑯琊武王為世子親聘
焉生元帝恭帝崩元帝嗣位稱王太妃

梁

武帝丁貴嬪譙國人初產有神光之異紫氣滿室
性仁恕御下皆得其歡心不好華飾器服無珍

異生三子長昭明太子統次簡文帝廬陵王續
普通七年薨諡曰穆簡文帝卽位追崇曰太后

明

韓王仲淑妃亳縣人父勇任福建行都司指揮母
毛氏妃性慈仁宮人侍御和顏相接

貞節

魏

曹文叔妻譙郡夏侯文寧之女名令女文叔早死
服闋自以少年無子恐家必嫁已乃斷髮為信

其後家果欲嫁之令女聞卽復以刀截兩耳居
止常依夫之從兄曹爽及爽被誅曹氏盡死令
女叔父上書與曹氏絕婚強逖令女歸時文寧
爲梁相憐其少執義又曹氏無遺類冀其意阻
乃微使人風之令女歎且泣口吾亦維之許之
是也家以爲信防之少懈令女於是竊入寢室
以刀斷鼻蒙被而卧其母呼與語不應發被視
之血流滿床席舉家驚惶往視之莫不酸鼻或
謂之曰人生世間如輕塵棲弱草耳何自苦乃
爾且夫家夷滅已盡守此欲誰爲哉令女曰聞
仁者不以盛衰改節義者不以存亡易心曹氏
前盛之時尙欲保終况今衰亡何忍棄之禽獸
之行吾豈爲乎立祠在東門外

明

武平衛副千戶金源妻盧氏年二十三守節景泰
五年旌表

武平衛軍人程義妻何氏義從戎陣亡何氏年十
八子方一歲姑年五十乃紡績以供衣食貞節

三州志 卷之十 四
凜然年八十終景泰六年旌表

武平衛小旗李鼎妻封氏鼎死氏年二十一爲夫
守志孝事舅姑生遺腹子綬撫養成立弘治三
年旌表

武平衛僉事石彬妻華氏年二十六守節子璽成
立襲指揮職誥封恭人弘治十四年旌表壽六
十七

武平衛廩生毛繼妻宋氏弘治十三年繼死氏年
十八苦塊神主前每夜以夫衣爲覆四十年不
出閨闥哀毀傷目年八十四而卒嘉靖四十二
年十月巡案朱奏獎與海烈婦李氏並附祀於
夏侯令女之祠

盧昇妻王氏

蔡春妻蘓氏

穆榮妻武氏

蔡景妻陳氏

吳童妻楊氏

蔣瑤妻陳氏

楚良妻陳氏

李桂妻孟氏

趙玄妻崔氏

趙貴妻廖氏

以上數氏俱嘉靖以前人能青年守節白首
完貞者明志以未經題旌僅有其名不詳事

實至頂台戶冬志并此削之嗚呼斃斃婦
此論真君子人也。存之亟是。

仍列其姓氏以慰貞魂

明洞妻芮氏年二十九歲洞病篤氏懷娠兩月與

夫訣生男則撫女則從死及夫亡後數月生男

乃設夫遺像抱子朝之因名曰朝望至七齡延

傳授業長為州諸生書香綿及數世氏享年七

十有餘旌曰優獎慈節

武應時妻王氏應時六世祖至應時皆同居應時

少亡氏年二十四子立六歲卓三歲老姑在堂

氏忍死以養老撫幼姑歿泣血經年及子長復

率同居之義上官屢旌之歲給白米四石氏年

七十五卒

高履中妻楊氏翁高仰之遠任山西壽陽履中卒於外氏年十八方擬歸塋未幾翁姑雙亡任所俱氏經理殯殮扶櫬歸里守節五十六載而卒郡守旌其門曰梅節冰霜

生員蔣賢妻周氏二十四歲賢卒遺子堯年僅三歲撫養成立授武平衛百戶娶妻劉氏生子鳴鳳方三歲堯年又卒劉氏年二十六歲姑媳共撫此遺孤及長授千總郡守旌其門曰母師後

闖賊之變鳴鳳分守城池旌其門曰忠孝世家儒生高尚德妻李氏生子搏九方幼尙德卒氏守節教子享年九十通學公舉其節搏九後以弱冠中鄉試副榜

武平衛百戶馬化龍妻周氏生子驃在祿化龍卒遺腹生子馴是時舅姑俱歿尙有太姑在堂氏伶仃孤苦事老撫幼不憚艱難自三十三歲守志至八十五歲卒驃妻薛氏生三子驃故薛氏年二十四歲效姑守志兩世雙節郡守屢旌其

門

賈紹曾妻陳氏曾死子德懋方十一歲少子九歲氏紡績教子歷十四載病卒年四十有八後懋入郡庠舉鄉耆子璠及瓊俱爲州諸生

庠生楊應儉妻薛氏通經史儉故氏撫教四子相繼入庠孫亦爲州諸生守志三十餘年而卒

薛炳妻楊氏鄉賓楊位之女炳故氏年十九無子以公姑無倚孝事四十載及公姑歿氏隨卒郡守葉旌其門曰節孝流芳

中書舍人李文明側室夏氏生員李天貴庶母十七歲未生育舍人捐館氏誓從死不飲食者累日婦氏勸止乃幽居一室守五十年如一日及婦氏故茹荼弔影淒寂自甘誠難得也

李思孔妻周氏誓志撫孤俾子李正成名

武舉穆雍詩妻明氏雍詩病卒氏年十九歲苦節自守撫幼孤以成立享年八十七州守獎其門曰勁節凌霜又曰慈懿貞風

李永蕃妻賈氏蕃故遺孤僅三歲氏茹荼撫育俾

之婚娶後子被寇傷而歿氏守志不衰人共愍之

生員郭第妻李氏第歿子繼震繼坎俱未成立時值飢荒無依氏勵志守撫卒年六十有七

生員高應良妻李氏良故氏二十歲子方週歲舅姑俱年老氏盡孝道教孤子子入州庠崇禎末賊入亳城母子避難相繼卒於濠上其姪歸葬之

馬陽銓妻楊氏銓歿氏年二十四子貽穀七歲貽

謨六歲氏守志撫之馬銓弟馬新繼卒妻王氏年十九謂楊氏曰汝有子宜撫我無子宜死至夜王氏縊於柩傍後次子貽謨以冲年補博士弟子員舉郡其稱二氏之節烈

周之魁妻邱氏魁亡氏年二十有八撫子守節四十餘年

鄭棟妻田氏妾李氏王氏棟亡三氏同心苦守始終不渝郡牧旌其門曰一門全節

庠生顏如惠妻袁氏如惠早逝氏誓志守節乃自

錮一室薪水之外無所需茹荼飲蘖歷四十年
郡守旌其門曰栢舟完節

汪淵妻李氏淵死氏爲守志上侍八旬之姑下撫
兩月之子不憚艱辛自勵不變年至八十而卒
監生楊官妻黃氏官死氏年二十五歲守志不渝
州牧嚴特行申請旌獎按院崔師爲題奏氏居
屋旁有一井係氏時出汲水之區井中常升香
氣如桂花及建坊之命下而香氣始息人咸異
之在南門題曰貞節

雅義妻董氏義故氏產遺腹子名金聲撫守至三
十餘載子金聲又故與其媳王氏共撫孫咸美
紹美以至成立姑媳遭亂食貧保全後嗣人共
憫其苦節

李文明妻史氏夫早逝氏年方十五子天秩尙在
襁中氏艱辛守志又當兵火播遷流離始終不
變終之日申請題旌

生員趙明殿妻高氏崇禎壬午遭闖之變明殿死
於賊氏年十九子女俱無有舅姑在堂乃以姪

為嗣事親撫後茹荼完節

國朝

孫希孟妻袁氏希孟歿時氏年十九為夫守志上奉老姑下撫孤子閭里稱為賢孝順治十八年

旌表

馬鼎銓妻楊氏康熙十年 旌表

李繼泉妻孫氏雍正四年 旌表

儒童張應麟妻章氏生員章與胞之女三歲失恃學於父悉通閩範女箴諸書年十五于歸克盡

婦道越五年應麟卒氏年二十遺孤績甫三歲

苦守以事舅撫子罹兵荒携子栖於廢庄採野

菜以自給冬無棉絮晝拾薪向火夜卧灰燼中

安集後紡績以奉舅及繼姑貧不能延師口授

績以句讀十四始就外傳卒為名諸生子媳先

亡又撫孤孫成立壽八十有六孫五人長養聖

歲貢季履仁廩生曾孫鯤壬子舉人雍正五年

旌表

黃位中妻賈氏位中故時氏年二十有六守節五

十一年

生員黃嘉秀妻支氏嘉秀卽黃位中子故時氏年二十有八一子方離襁褓上有祖父母並孀姑氏事老撫孤守節五十六年

儒童支璞妻李氏璞故氏年二十二歲孝事繼姑撫三歲孤子至成立復死以姪孫繼嗣守節五

十三年

鄧守禮繼妻胡氏方嫁夫卽病奉侍湯藥日夜祈禱者六年夫亡姑旋歿家貧紡績以事衰翁無

出繼孫姓教養婚娶守節三十六年

孫培五繼妻孟氏孝事老姑滌滌躬親不假婢手姑亡助夫喪葬盡禮明季隨夫避難泗盱間料事多中獲免於難定閏後還亳氏年二十四夫亡遺孤興祥六歲興瑞四歲泣曰吾所以不死者爲此二子也播遷之後家計衰薄紡績茹荼竭力修脯延師教子俾得成立興祥入州庠興瑞業儒早世守節五十九年壽八十三歲

貢生李廷學側室陳氏夫亡年二十九歲孝事衰

翁義方訓子守節四十三年

生員劉振先妻王氏

以上雍正六年 旌表

田永鎮妻黃氏十六歲于歸兩載夫亡遺腹生女
欲以身殉因上有兩代孀姑忍死孝養守志五
十年

庠生劉安邦妻楊氏年二十二安邦疾篤以孀母
生母兩孀姑囑其奉養氏涕泣受命及卒有三
月遺孤仰事俯育備極辛苦守節四十餘年

吏員楊甲第妻吳氏年二十四夫亡無子撫兩孤
女艱苦以養孀姑

監生張綏妻姚氏年十八夫亡無子服闋父母諷
令改嫁自此不復歸寧翁病侍奉湯藥不解衣
者七十餘日及翁歿家業衰薄賴紡績以供姑
甘旨姑不忍食每托言親鄰所餽以安姑心撫
嗣子以承宗祀

吏員楊震妻孫氏竭力以事翁姑貞孝兩全
李月恒妻孫氏事翁姑撫遺子守志終身

以上雍正八年 旌表

廩生孫士傑妻王氏夫歿舅姑衰老養生送死備極孝道撫兩幼子讀書成立雍正九年 旌表
儒童王元錫妻支氏幼知書達禮年十五于歸至次歲夫亡無子慟哭幾絕舅姑慰以次子生子卽爲長門後遂忍死守志及次子生子巖未彌月卽繼爲嗣撫至成立入州庠巖生子德奇氏以祖母親授句讀德奇未冠成名生子慶澤德奇病故巖亦繼亡一門三孀氏以八十老身同

子婦田氏孫媳劉氏教養曾孫慶澤苦節七十年壽八十五歲雍正十年 旌表

儒童陳諫茂妻楊氏年二十三歲夫歿家貧翁老撫二歲孤子至四十七歲而亡又率孀媳撫二歲成立

儒童馬龍圖妻周氏年十七夫亡家貧紡績針工不虛晝夜以奉老病孀姑撫二歲孤子成立苦節六十四年

儒童李永壽妻郭氏年十九夫亡殯葬皆出裝資

生一女越三年女亦死蓬頭垢面紡績以奉公姑立姪爲嗣

儒童高帽妻李氏夫亡無子上有兩代孀姑夫弟二人俱幼祖姑及姑繼亡撫兩幼叔成立完娶後叔生子立爲已嗣兩叔又亡並嗣子及姪皆故一門七寡皆賴氏一身維持惟遺孤孫一人

延師訓讀

儒童支瑤妻李氏事嫡庶孀姑盡孝不替夫亡無子欲以死殉兩姑防獲得不死撫養夫弟成立

生子三朝抱立爲嗣揚州牧旌以匾額曰節壽俱高

生員王士炳繼妻李氏年二十六歲夫亡孝事翁姑勤撫繼子苦節四十二年

儒童宋鏡妻楊氏撫遺腹子守志不衰

以上雍正十一年 旌表

儒童孟登霄妻任氏年二十三歲夫亡上有舅姑衰老子泰如方四歲家貧勤紡績以供菽水撫孤成立入泮食餼歲貢守節三十四年而終係

前明人載在舊志今邀 旌典

梅友檜妻宋氏年二十歲夫亡守志姑病歷年奉湯藥晝夜不倦姑歿哀毀過節又奉事衰翁憂勞成疾而卒無子以姪爲嗣

候選州同吳起龍之女李建業之妻吳氏夫亡無子孝事孀姑撫嫁二女立姪爲嗣

生員崔遷妻譚氏年二十三歲夫亡上無翁姑撫四歲一歲兩孤子成立

儒童支長嗣妻馬氏于歸前一夕長嗣突衄血不止氏至強扶掖行禮舅姑居氏於別室氏日夜虔禱願以身代踰月而長嗣殂自縊不得死父母舅姑諭以死節易守節立嗣難氏悟遂不死立姪爲夫後守志三十餘年

以上雍正十二年 旌表

馬天印妻齊氏守志不衰乾隆五年 旌表

王元召妻司氏守志不衰乾隆五年 旌表

生員丁永馨妻徐氏年十七于歸翁姑病氏奉湯

藥三載翁姑亡夫旋以衰毀疾卒子時聞四齡

氏守志撫孤成立孫方中曾孫煙芝蘭皆州庠生享年七十有四

儒童宋之祖妻劉氏夫亡氏年二十一老姑在堂並無伯叔可依躬織作以奉姑甘旨生遺腹子國卿教之成立

趙士秀妻于氏夫亡上有祖姑六十四歲遺孤二歲女四歲艱苦紡績以養老撫幼祖姑歿後子年二十孫四週一年內繼亡本門無過繼之人乃爲夫堂第士濯娶室生子松爲嗣守節四十年

餘年

儒童徐彩妻高氏祖姑雙瞽舅姑以奉事委之飲食起居委曲周至得其歡心夫以勤讀致病卒所生一子一女相繼夭殤氏慟極欲自殺舅姑憫諭之乃忍死守志孝養有加翁側室生二子氏喜承祧有待及翁姑繼歿兩叔尙未成立氏竭力撫養婚娶後叔生子繼爲夫後守節數十餘年

儒童高過妻楊氏過家貧湖地百畝皆窪不足以

供衣食氏紡績佐之夫歿氏自忍飢寒養姑撫弟越八年而弟迄有室舉四子氏以其第三子爲夫承嗣

李廣孕妻羅氏廣歿氏年二十三撫孤守節以終左光先妻楊氏光先死氏以青年守志終身

以上見舊志

孫璉妻馬氏增生馬煥女貞靜嫺禮年十八于歸時璉已病氏執婦道維謹越五年璉歿氏欲以身殉念姑張氏老而無嗣因勉活養姑姑病瘵

餘年

儒童徐彩妻高氏祖姑雙瞽舅姑以奉事委之飲食起居委曲周至得其歡心夫以勤讀致病卒所生一子一女相繼夭殤氏慟極欲自殺舅姑慰諭之乃忍死守志孝養有加翁側室生二子氏喜承祧有待及翁姑繼歿兩叔尙未成立氏竭力撫養婚娶後叔生子繼爲夫後守節數十餘年

儒童高過妻楊氏過家貧湖地百畝皆窪不足以

供衣食氏紡績佐之夫歿氏自忍飢寒養姑撫弟越八年而弟遂有室舉四子氏以其第三子爲夫承嗣

李廣孕妻羅氏廣歿氏年二十三撫孤守節以終左光先妻楊氏光先死氏以青年守志終身

以上見舊志

孫璉妻馬氏增生馬煥女貞靜嫺禮年十八于歸時璉已病氏執婦道維謹越五年璉歿氏欲以身殉念姑張氏老而無嗣因勉活養姑姑病瘵

李喜女不知何代人事蹟不詳有烈女祠在義門

集西

隋

木蘭一名花弧姓魏氏亳州東魏村人隋恭帝時募兵戍北方木蘭父當往而老弟妹俱幼木蘭乃請於父代行歷十二年身接十有八陣樹殊勲人不知其女子也後奏凱還天子嘉其功除尙書不受懇奏省親乃命軍士衛至其家釋戎服而復巾幗同來者皆大驚駭軍士還奏帝召

赴闕欲納之宮對曰臣無媿君之禮以死拒之
帝驚憫贈將軍諡孝烈鄉人爲立祠歲以四月
八日致祭蓋其生辰云

明

海秀妻李氏嘉靖二年亳大飢秀死無以爲葬氏
負土爲墳悲號哀慟里巷感泣隣媪勸之嫁氏
以死自誓貧不能存活抱女沉河而死越三日
屍浮如生女猶在抱御史張惟恕表其閭附祀
夏侯令女之祠

孫鈞妻龐氏一作孫氏鈞販豕爲業夜行爲盜所殺氏
年二十四誓志守節夫族逼嫁氏遂自經

馬鼎新妻王氏年十九夫亡謂其寡姆楊氏曰汝
有子宜撫我無子宜死至夜縊於樞旁

王姓之婦曾氏夫早亡子幼寇至欲污之氏不從
就刃無懼色

胡尊周妻楊氏尊周死氏欲以身殉內外人防守
氏謂守者曰我不卽死爾誓退吾少卧及守者
退遂自縊

唐詩妻梅氏寇至抱幼女登樓面牆而坐寇入樓逼之氏大怒罵與女俱遇害

朱應鴻妻翟氏鴻年四十艱於起卧氏奉養備至鴻亡無以爲殮氏乃沿乞於途人僅得一棺殮畢卽自縊於棺側

庠生程宗洗妻王氏崇禎末寇至人皆奔避氏度在家與在途俱不免於辱遂自縊

程姓婦梅氏年十八值寇至登樓以避賊攻樓氏持磚擊賊不利遂自縊

程姓妻甯氏年二十四夫亡有姑在堂氏忍死以奉養至四十年姑死禮葬畢遂自縊於姑墓人稱其從容就義

程姓妻倪氏夫病嘗割己股以療及歿撫繼子以守節奉姑二十餘年闖賊之變爲賊所逼不受辱遂遇害

駱姓婦吳氏年二十夫亡撫幼子守節闖逆之變避賊在樓樓焚氏抱子下樓遇賊欲虜之不從母子俱被害

魏姓婦胡氏年二十夫亡無子惟一幼女氏撫女
守志十餘年值寇至乃自縊

吳希堯妻張氏希孟妻楊氏值寇至妯娌同行避
亂遇賊欲虜之楊氏先以傘柄擊賊俱被害

庠生楊芳溥妻王氏夫死候窆畢即自縊

翟雲府妻劉氏寇至破其樓全家被害欲虜氏去

氏給之曰吾夫有金埋後園可携以往賊欣然

赴園氏至井邊抱子投井死

庠生王二賢妻王氏闖賊之變賊逼賢宅氏避於

幽處賊執婢以索得氏促使上馬氏厲聲怒罵
被賊支解而死

國朝

蔡銳妻杜氏年十八于歸孝事舅姑及銳有疾侍

奉湯藥經年不替每遇朔望祈天請代銳歿俟

殮畢即縊柩旁上憲獎其貞烈

生員崔起妻程氏起子天祥妻胡氏崇禎末闖賊

之變二氏恐奔避被辱乃携手入室姑媳相向

縊死

懷毓秀妻冀氏勤慎事秀十餘年秀歿無子殮畢
從容就棺自縊郡牧以詩弔之

庠生王斌妻夏氏年十五于歸崇禎壬午寇陷亳
斌遭賊虜舅伯幾病不能行氏欲自刎爲家人
所救氏乃以釵鈿倩二僕負舅潛避道逢賊欲
驅氏行氏大罵曰我家世衣冠恨不能提刀殺
賊肯從賊行乎不屈而死

胡懋芳妻郭氏事姑孝崇禎時流賊寇亳北閔芳
負母偕氏奔北岍群盜突至氏扶姑避橋下賊
指曰汝從我氏以手挽姑賊怒曰我先殺此老
嫗氏曰寧虜我勿殺我姑輒趨登橋賊持刀從
之至橋巔奮身投急流中死

孫養冲妻李氏守節已二十六年流賊入城氏獨
廬居墓側有惡賊袁時中逼令造飯氏大罵賊
被殺而死

高承烈妻許氏承烈死氏自盡以殉

以上係雍正九年 旌表

陳桂環妻劉氏環他出氏獨居逆僕程申挾刃以

犯氏力拒就死申亦自殺

孫玉妻蔣氏玉死氏自縊

李善久妻王氏善久死氏自縊

李海金妻李氏海金死氏自縊

張覆達妻李氏嫁逾年達病故氏卽投纒翁姑救

甦氏曰是使少媳之魂無所依托也遂聽之達

係庠生張雋之子雋有女適聶世綬綬患血症

甫三月綬故氏誓以身殉家人密防無隙至歲

杪佯作笑語辦度歲事防遂懈入室自經二氏

親姑嫂也

張遠妻李氏遠死氏自縊

戴希聖妻程氏希聖死氏自縊

鄧士勳妻蔣氏士勳死無子苦節奉姑及姑歿葬

畢投纒死

鎖琰妻李氏嫁僅三日琰死氏視殮畢卽自縊以

殉

馬景瑗妻邢氏瑗死氏撫孤守志及孤痘殤氏自

縊死

鄧成龍妻丁氏成龍死氏年二十二絕粒不食死
張御六妻仰氏御六客死於外及柩歸氏自經以
殉

生員孫伯祥妻李氏夫亡自經

節烈女

明

侯氏女許字儒童徐文起未嫁而起卒女年十五
聞訃欲自盡母防守不得死乃赴徐家弔祭遂
不肯還於柩旁齋宿三載穎道胡公聞而獎之

後遇荒亂徐侯二家俱死亡女依族姪侯位而
居苦守四十八年

朱綬女名蘭許字胡姓年十四寇攻鄰樓急女作
纒引頸令父縊之父不忍女自收繩噴血死

生員吳太亨女名第許字程氏子年十五寇至避
於姑樓賊火攻樓女墜下賊強之行罵賊被殺

國朝

張小四姐惡少程某強逼之四姐奮罵不從遂遇
害順治年旌表

劉氏女許字胡桌未嫁胡病篤翁姑欲迎氏歸父
 母有難色氏從容告曰夫病舅姑老願往侍湯
 藥至胡門五十八日夫卒欲殉不得矢志守貞
 孝侍翁姑及繼姑撫育嗣子八歲復夭再嗣成
 立雍正六年 旌表

馬文炳女名長姐許字未婚聞夫訃即自縊

馮氏女許字傳守昆守昆死訃至女即自盡

侯氏女許字徐某夫歿苦志守貞按前明有侯氏女許字徐文起

見舊志今通志兩載恐係二人同姓氏者不敢削也

薛氏女許字張道福張為賊擄氏守貞五十餘年
 卒

王氏女名素貞即王五姐傳載藝文

賣腐女傳載藝文

木工商良弼女年十九有姿色鄰人任五乘其父
 出破門強逼之女以死拒左目被傷父聞難歸
 視任逸去而女縊死矣知州尤公申其烈巡撫
 收在治罪給良弼銀三十兩令建坊焉

孝婦

貢生李廷學繼妻朱氏翁年老鍾愛廷學元配戴氏所生子長生氏撫育如已出以慰舅志常以不及事姑爲恨懸像朝夕奉之廷學入都應試值翁病篤氏割股治療以進遂愈氏因患羸生子長桂彌月而卒後長桂中武舉人建孝婦祠爲家廟雍正八年 旌表

生員高天賜妻王氏在室時值母病禱于北辰願以身代母旋愈及嫁事舅姑如事父母後天賜至鳳陽歲試姑病氏奉侍湯藥衣不解帶七十餘日百藥無效時值隆冬大雪姑思食笋氏念不可得因於後園雪地拜禱數日竹生四芽烹以進姑鄰里共見及天賜試歸而母已愈矣州牧儒學俱旌以匾額曰百行首推壺中模楷乾隆元年 旌表

外傳

天地之氣有清不能無濁生人之類有正不能無邪君子小人安得齊而一之耶毫稱中土其地靈而人傑固脩載於簡編至世否奸生或權臣亂國或汚吏擾民或諧媚之不知羞或亂賊之無所忌雖世變使然亦穢跡難揜也夫詩存三百貞淫交見史傳歷代忠佞並書附外傳于人物之末者亦猶檣杙垂戒之義云爾

漢

曹騰字季興沛國譙人少故謹厚桓帝立騰以有
定策功封亭侯加位特進騰用事省闈三十餘
年奉事四帝未嘗有過其所進達皆海內名士
蜀郡太守因計吏賂遺於騰益州刺史种暠嘗
劾騰下廷尉騰不爲織介常稱暠爲能吏時人
嗟美之暠後爲司徒告賓客曰今身爲公乃曹
常侍力焉騰子嵩靈帝時貨賂中官及輸西園
錢一億萬故位至太尉

桓溫字元子桓彝之子也溫自江陵北伐行經金
城見少爲琅琊時所種柳皆已十圍慨然曰木
猶如此人何以堪攀執枝條泣然流涕於是過
淮泗踐北境與諸寮屬登平乘樓眺矚中原慨
然曰遂使神州陸沉百年邱墟王夷甫諸人不
得不任其責袁宏曰運有興廢豈必諸人之過
溫作色謂四座曰頗聞劉景升有千斤大牛噉
芻豆十倍於常牛負重致遠曾不若一羸犍魏
武入荊州以享軍士意以况宏也坐中皆失色
後加侍中大司馬都督中外諸軍事假黃鉞太

和四年又上疏北伐與慕容垂戰於襄邑溫軍敗績死者三萬人溫久懷異志欲先立功河朔還受九錫旣逢敗覆名實頓減於是叅軍郗超進廢立之計溫乃廢帝而立簡文帝初望簡文帝臨終禪位於已旣不副所望遂寢疾不起

桓玄字敬道一名靈寶大司馬溫之孽子也其母馬氏夜坐月下見流星墜銅盆水中得而吞之遂有娠生玄溫甚愛異之後爲廣州太守平殷仲堪楊佺期詔以玄都督荆雍等八州及揚豫

八郡玄於是樹用腹心兵馬日盛自後多與朝廷構怨元興初後將軍元顯稱詔伐玄玄於是興兵至新亭元顯自潰玄入京師殺元顯於市及太傅道子以下多遇害其後矯詔加相國封楚王加九錫僞上表求歸藩又自詔留之玄自篡盜之後驕奢荒侈遊獵無度以夜繼晷性又急暴呼召嚴速朝拜芳悴怨怒思亂者十室八九焉於是劉裕劉毅何無忌等共謀興復及義兵至桓謙等請軍一時奔潰玄率親信數千人

相與南奔至江陵石康納之劉毅等復進師與
立戰於崢嶸洲毅軍乘風縱火盡銳爭先立衆
大潰立欲奔入蜀至枚回洲為益州督護馮遷
所殺初遷抽刀而前立拔頭上玉簪與之仍曰
是何人耶敢殺天子遷曰欲殺天子之賊耳遂
斬之時年三十六立自篡盜至敗日凡八旬矣

隋

朱粲亳州城父人初為縣吏大業中從軍伐賊長
白山亡命去為盜號可達寒賊自稱迦樓羅王

衆十萬度淮屠竟陵沔陽轉剽山南所至殘戮
無遺噍僭號楚帝建元為昌達攻拔南陽後與
山南撫慰使馬元規戰大敗又收餘衆復振至
二十萬粲所克州縣皆發藏粟以食遷徙無常
去輒燔屠聚毀城郭不務稼穡專以劫為資於
是人散盡死者滿路其軍亦匿乃掠小兒烝食
之謂其徒曰味之珍寧有加於人者第使他國
有人何患無儲哉勒所部掠婦人孺兒分烹之
又稅諸城細弱以益糧隋著作郎陸從典通事

舍人顏愍楚謫南陽粲初引爲賓客後盡食陸
顏兩家俄而諸城懼皆逃散顯州首領楊士林
田瓚起兵攻粲旁郡皆響應戰於淮涯粲大敗
挈殘兵奔菊潭遣使乞降唐高祖以前御史大
夫段確假散騎常侍勞之確醉戲粲曰君膾人
多矣若爲味粲曰噉嗜酒人正似糟豚確恚罵
曰狂賊歸朝乃一奴耳復得噉人乎粲懼收確
於坐並從者數十人悉養之以饗左右遂屠菊
潭奔王世充署龍驤大將軍東剖兵斬粲洛水

上士庶競擲瓦礫擊其尸須臾若塚

五代

朱漢賓字績臣亳州譙人也其父元禮爲軍校從
梁軍戰沒於清口漢賓爲人有膽力梁太祖以
其父死於戰憐之以爲養子是時梁方東攻克
鄆鄆州朱謹募其軍中驍勇者黥雙雁於其頰
號雁子都太祖聞之乃更選勇士數百人號落
雁都以漢賓爲指揮使及漢賓貴人猶以爲朱
落雁漢賓事梁爲天威軍使歷磁滑宋亳曹五

州刺史安遠軍節度使唐莊宗滅梁罷漢賓爲
右龍武統軍待之頗厚後莊宗因出遊幸其第
漢賓妻有色而慧因侍左右進酒食奏歌舞莊
宗懼甚留至夜深而去漢賓自此有寵初漢賓
在梁也與朱友謙俱爲太祖養子而友謙年長
漢賓以兄事之其後梁亡漢賓數寓書友謙友
謙不答漢賓啣之其後友謙見族人皆以爲漢
賓有力焉明宗入立以漢賓爲莊宗所厚惡之
以爲右衛上將軍安重誨用事漢賓依附之相

爲婚姻由是復得爲昭義軍節度使重誨死漢
賓罷爲上將軍遂以太子少保致仕漢賓臨政
能守法好施惠人頗愛之清泰二年卒年六十
四晉高祖時贈太子少傅諡曰貞惠

元

韓林兒韓山童之子本樂城人先世以白蓮會燒
香惑衆謫徙永平元至正十一年山童倡言天
下大亂彌勒佛下生愚民翕然從之與劉福通
杜遵道羅文素盛文郁等以紅巾爲號告天起

兵縣官捕之急山童就擒其妻楊氏及子林兒
逃之武安而劉福通等遂破潁州據成臯攻陷
上蔡光息等地尋爲也先帖木兒所擊韓咬兒
等被擒上蔡等地仍爲元所復十五年二月劉
福通等自礪山夾河迎林兒至立爲皇帝又號
小明王建都在亳州自以爲徽宗之裔因國號
曰宋建元龍鳳以其母楊氏爲皇太后杜遵道
盛文郁爲丞相劉福通羅文素爲平章劉六知
樞密院事折鹿邑太清宮之材木以爲宮闕遊

道等各遣其子入侍未幾福通疾遵道專權命
甲士擲殺之自爲丞相冬十一月元答失八都
魯以兵進次許州與福通軍遇戰於長葛爲福
通所敗將士將奔潰至中牟收散卒屯聚會劉
哈刺不花引兵來援大破福通兵復駐汴梁十
二月又敗之於太康遂進圍亳州福通以其子
林兒走安豐十七年二月韓林兒將李武崔德
破商州攻武關遂直趨長安分掠同華等州三
輔震恐尋爲察罕帖木兒李思齊連兵所擊而

敗三月韓林兒將毛貴攻破膠萊等州八月劉
福通攻汴梁分遣閔先生破頭潘馬長舅沙劉
二王士誠攻晉巽白不信大刀教李喜喜趨閔
中元鎮守黃河義兵萬戶田豐來降兵勢大振
十八年三月毛貴破濟南路殺元河南右丞董
搏霄無血唯見白氣冲天又破薊州五月劉福
通破汴梁韓林兒遂都於汴六月閔先生破遼
州大掠塞外諸郡十二月由高麗轉破上都盡
焚元之宮闕十九年四月趙均用殺毛貴貴將

續繼祖自遼陽入益都殺均用與所部自相仇
殺八月元察罕帖木兒大發秦晉兵諸路並進
圍攻汴城城中兵不敢出而糧已盡遂破之福
通與韓林兒突圍而出復走安豐二十一年元
察罕帖木兒克山東田豐降於元二十三年張
士誠將呂珍入安豐殺劉福通而閔先生餘黨
復攻上都爲孛羅帖木兒所敗盡降於元二十
六年冬十二月韓林兒卒無嗣宋亡

按明太祖初起時翁用龍鳳元年之朔及入

建康龍灣采石之捷欲奉林兒爲帝劉基曰
彼牧豎耳奉之何爲後太祖稱吳王時凡用
人行政見於牒文者仍稱曰皇帝聖旨吳王
令旨上下施行率以爲常二三年中不自建
年號及林兒卒始稱吳元年其謙抑不敢自
尊之心非草竊者所可及其萬一也夫韓宋
一列國耳太祖亦未嘗臣於彼劉青田之不
奉宋朔誠深明王者之大義不肯以一時之
權宜遂遺萬世之口實而太祖不自居之心

亦爲可美但舊志以韓林兒比之楚義帝太
祖之奉宋比之漢高祖之奉楚而又以文王
三分有二以服事殷比之夫文王世爲殷之
侯服漢高曾北面而臣義帝而以此二主比
美於明太祖可謂擬非其倫不知大義者矣
君子一言以爲智一言以爲不智其可妄爲
議論乎

明

石壘本籍宿松人始祖石良元末時天下已亂乃

乘亂聚衆至數百人而起至正辛丑率其衆以歸於明遂除授鷹武衛正千戶洪武四年調鳳陽洪塘屯良死子敬襲敬死敬子閏襲調武平衛自閏始閏之子斌從征大同有功陞本衛指揮僉事無子璽以姪孫承襲僉事人勇敢有膂力性多機警尤善伺人意旨正德六年楊虎作亂入亳境璽同百戶夏時擒楊虎及其姪樸誅之平寇有功陞授叅將時武宗寵江彬朱寧璽以賄得深相固結赫奕一時招集惡少數百人

爲家丁多方奪占軍民財產復平人墳墓爲田園擅設抽分強索商人財貨無故磔殺使婢率令黎實黎釗賈得石彪石在石惠石瑞董龍高祿屈振李謙李堂王佐張來曾項等數十人私造盔甲牌面弓刀令家丁演習兵陣號稱父子兵密令馬機王彪投逆濠頭目武廟駕至南京江彬引璽詣行在及引見武廟後志益橫所爲愈無忌憚江西巡按胡傑抄寧邸於故篋中得石璽通濠書遂同御史寧仁合奏事下法司遣

郎中蔣彬千戶謝裕刑部錦衣官行勘後歸副使按察李爵問擬得實璽發南丹衛充軍亳州知州顏木並發其奸赴懇被害者千餘人璽子石堅承襲署指揮使陞署都指揮僉事復守備歸德府石堅又怙惡世濟強橫益甚復統家丁王盤趙順秦表秦志阮欽等五百餘人依附聲勢脅制有司武斷鄉曲莫敢誰何於是指揮使趙金奏石堅殺死潘天運及一家非死罪三命遂逮堅下獄河南巡撫都御史何具擬題奏奉

旨欽依將石璽王盤處斬決文未至而石璽知罪惡盈稔無可寬宥越逃至真定東鹿靖遠伯家轉匿東昌州牧顏木復擒璽至亳婦人女子罔不撻罵遂爲郡民丁淮所踢死其子石堅亦畏御史張惟懋案罪自縊死獄中乃流徙石璽之孫於隆慶衛知州顏木復細查石氏父子奪占軍民黎釗等一千一百餘家田土共五百八十二頃房屋四千九百八十七間銀三萬六千二百三十一兩金一十六兩布帛八十端騾馬

五十頭匹各給還其王雪萬姓之沉寃鋤積年之巨慝一時稱快

李先芳曰石璽之戡亂功也亦職也安足以贖其橫逆之罪乎大抵小人進用必先以功能見售然後膽肆其惡故犯大逆者斷非庸昧之人作大奸者俱出狡黠之手以璽之罪浮於功奚啻什伯殃及千家而戮止一身尙有遺憾寧復爲之憐乎